

Nga Taputapu

Ko nga taputapu tirohanga maatanga ka horaina mai e too Kaiwhakarite o te Huihuinga o Tiikapa Moana o Hauraki. Me mau mai e ia kura toona paepae takai, rongoa hoki, me teetehi wiihara, me teetehi waea puukoro, hei whakamahi maa te kaiako.

Maa ia tangata e mau mai

- he kaakahu mahana, pareua hoki
- he huu ka taea te rumaki ki te wai, ki te paru (he rawe te kamupuutu, te huu omaoma raanei, ehara nga jandal i te huu pai)
- he huu he kaakahu hei kuhunga maa te tangata, he peeke kirihou hei hoatutanga maa nga kaakahu maakuu, paruparu hoki
- he pare tiikaaka, me te pootae whakamarumaruru, he wai, he kai aano hoki

I mua i te Tirohanga

Me aata whakaroopuu nga aakonga e nga kaiako. Moo te nuinga he pai te mahi mehe e 3 nga aakonga ki te roopuu. Me toha he kaiaawhina pakeke ki ia roopuu aakonga. Me whakahaere teetehi kauwhau moohiohio, haumaruru hoki moo te 30 meneti i mua i te tirohanga, hei konei ka taakina anoo nga tikanga tirohanga.

Nga Ritenga Mahi moo Te Tirohanga Maataitai HGF

Titiro mai: he tikanga kotahi teenei moo te tiro maataitai, araa atu anoo nga tikanga whai take. Ka whakaaturia teenei i te whakaaturanga powerpoint i te taha.

1. Whakamahia he rau puukete raraunga moo ia waahi tirohanga i runga i te tiipokatanga.
2. Tuhia te ingoa o te roopuu, o te kaituhi, o te waahi tiipoka me te takotoranga waahi (te puu me te tau i te kara), i te rau puukete raraunga.
3. Tirotiro ki mua ki muri i a koe ka whakapuukete ai i nga mea ka kitea e koe i te waahi tango taataura i te pouaka 'Whakamaarama moo te Waahi'. Me whakapuukete hoki te momo rarokirinuku/me aata tirotiro toona hanga me nga otaota o runga (ina koa, te otaota moana, te puukohu wai), hei whakaoho i te hunga whai waahi mai kia whakaaroaro moo nga tikanga waahi noho maa te maataitai.
4. Poua matapookeretia too puutapawhaa – i roto i te 2 mita o ia pou tiipokatanga.
5. Aata tohua te huahua puutapawhaa maa te tuhi haere ki te one, huri noa i te tapa whakawaho o te tapawhaa ki too kaaheru iti.
6. Whakamahia te kaaheru iti hei tiipako i too taataura i roto i te huahua puutapawhaa, kia 10 henimita pea te hoohonu, ka hoatu ai i nga keringa katoa ki roto i te taatari, i te paakete raanei.
7. Rurea te taatari ki teetehi hoopua wai tuutata, ki te moana raanei mehemea kei te tuutata mai. Ringihia mai teetehi paakete wai ki roto raanei, hei horoi atu i te one me te paru.
8. Tangohia nga toka, nga koohatu me nga maakoi (mate) mai i te puutapawhaa.

9. Koomakatia ngaa momo maataitai ora o roto, ka tautohu ai i te katoa.
10. Tauria, inea hoki ngaa tuangi me ngaa pipi ora katoa ki te puurere ine. Ahakoa kei te ora te aahua eeteahi tuangi/pipi ki te tiro tiro atu, engari kua kii i te onepuu, kimihia ngaa maakoi aahua paapango, ka ngana ai ki te whakatuwhera, kia kitea ai mehemea kei te ora, kua mate raanei (kua puare, kua kii raanei i te onepuu). Whakamahia he puunaha tatau hei whakapuukete i te maha o ngaa tuangi/pipi i te rau raraunga.
11. Tauria katoatia ngaa momo maataitai ora katoa atu, me te aata whakapuukete e hia i te rau puukete raraunga.
12. Tauria te tapeke o ia momo. Ki te kore koe e kite i eeteahi maataitai i teeteahi waahi taatauirā, whakapuuketetia 'kaare kau', tuhia 'korekore ana' raanei kia moohiotia ai kaaore i wareware teenei waahi taatauirā.
13. Whakahokia ngaa koohatu, ngaa maakoi me ngaa koiora ora ki te rua tango taatauirā i mua i too whakapuukete i ngaa mea katoa.
14. I mua i too nuku ki te waahi tango taatauirā panuku aata tirohia kua whakapuuketetia e koe ngaa moohiohia KATOA kua hoatu te ingoa o te kaituhi i runga rawa o te rau puukete raraunga.
15. I mua i too nuku ki te waahi tango taatauirā panuku aata tirohia kua haria e koe ngaa taputapu katoa.
16. Tohaina ngaa mahi katoa (ina koa, te kaituhi rau raraunga, te kaiwhakakii paakete wai, ngaa kaikeri one, ngaa kaitaatari, te kaikoomaka maataitai, te kaitautohu maataitai, te kaitatau me te kaiine) ina nuku koe ki teeteahi ira tango taatauirā hoou.
17. Paatai atu ki ngaa kaimahi tautoko o te Huihuinga Tautoko o Tiikapa Moana o Hauraki, moo eeteahi aawhina moo ngaa tohutohu me te whakautu paatai.

Kia oti ngaa mahi tirohanga

- Tirohia ngaa rau puukete raraunga i runga i te hohoro kia moohio ai kua pai te whakapuukete i ngaa moohiohia katoa.
- Whakahokia mai ngaa pou tuutohu me eeraa atu taputapu (te puutapawhaa, te kaaheru iti, te raakau ine, te papa karapine/ngaa rau) ki te waahi huihui.